



Cultura & Sotziedade

Naschet su Coordinamentu pro su Sardu Ufitziale.

Naschet su Coordinamentu pro su Sardu Ufitziale (C.S.U.). Sa situatzione generale de sa pòlitica linguìstica oe in Sardigna (mancat una lege ispetzìfica pro s'avaloramentu de su sardu; mancat su Pianu triennale de is interventos de promovimentu e avaloramentu de sa cultura e de sa limba sarda cunforma a s'art. 12 de sa L.R. 26/1997; bolet annoadu s'Osservatòriu regionale pro sa cultura e sa limba sarda cunforma a s'art. 5 de sa L.R. 26/1997) e una filera de cosas acontèssidas in is ùrtimas chidas (iscadèntzia de s'incàrrigu de su Direttore de su Servìtziu Limba e Cultura Sarda de sa R.A.S.; aprovazione de su Patu de istabilidade internu de sa R.A.S. chi no assignat pro is interventos in favore de sa limba sarda sa prioridade de ispesa chi ddis deghet; perìgulu de acorpamentu de is servìtzios de sa R.A.S. vacantes e duncas fintzas de su Servìtziu Limba e Cultura Sarda) faghent nàscheres – a manera legìtima – prus de unu pistighìngiu in contu de su benidore de sa limba sarda, pro more ca non si bidet oe unu disignu craru de programmatzione de interventos pro dd'avalorare. Custos cunsideros de importu faghent nàscheres s'apretu de dare vida luegos a unu COORDINAMENTU PRO SU SARDO UFITZIALE, cun sa punna de pònneres a disponimentu de is istituziones, de is faeddadores e de chie totu est interessadu documentos, materiales, consìgios, istrategias, fainas chi portent a un'avaloramentu beru de sa limba sarda in cale si siat cuntestu sotziale de impreu e a s'ufitzializatzione sua in s'Amministrazione pùblica, in s'Universidade, in s'Iscola, in sa Crèsia. Su COORDINAMENTU est abertu a sa partetzipatzione e a su cuntributu operativu de chie (tzitadinos, insignantes, operadores de sa limba, intelletuales, assòtzios culturales, assòtzios de categoria, sindacados, movimientos e partidos pòliticos, impresas, e sighende) tenet a coro sa sorte de sa limba sarda e cumpartzit s'idea de s'ufitzializatzione cuncreta sua, ponendesi a disponimentu de is istituziones chi depent pònneres cambas a una pòlitica linguìstica sèria e atziva in Sardigna, sighende s'àndala de is fainas acumpridas e/o incarreradas in is ùrtimos annos dae sa Regione Autònoma de Sardigna e pighende in su cunsideru giustu sa netzessidade de sighire a promòveres una norma comuna pro is impreos iscritos de su sardu.

Pro àteras informatziones e aprofundamentos e pro is adesiones a su COORDINAMENTU si podet iscrìere una e-mail a s'indiritzu [sardufitziale@gmail.com](mailto:sardufitziale@gmail.com)

Comitadu promotore: Alessandro Biolla, Angelo Canu, Giuseppe Corongiu, Diego Corraìne, Antonio Ignazio Garau, Marinella Marras, Giuseppe Orrù, Marianonietta Piga, Giovanna Francesca Piras, Giorgio Rusta, Salvatore Sarigu, Rinaldo Spiga, Gianluigi Stochino, Giovanna Tuffu.

31-05-14.

[U.R.N. Sardinnya ONLINE](http://www.sanazione.eu)

[www.sanazione.eu](http://www.sanazione.eu)

[urn.mediterraneo@gmail.com](mailto:urn.mediterraneo@gmail.com)